

11 SEPTAMBRA TANY ETAZONIA

Ny eto amintsika mbola mitohy hatramin'izao ny fampihorohoroana

Mbola tsy levon'ny vavonin'ny Amerikana hatramin'izao ny herisetra fampihorohoroana nihatra tamin'ny 11 Septambra 2001, tany New-York, fampihorohoroana tsotra izao ny ilazana ny zava-nitranga, satria ireo toerana manandaza tany Etazonia no nanamparan'ny mpampihorohoro ny heriny dia ny trano lehibe nijoalaloala nantsoina hoe: trano kambana na "World Trade Center" sy ny "Pentagon" tany Washington, foiben'ny fiarovana any Etazonia, nisy ny fanjerana fiaramanidina tamin'ireo toerana voalaza teo ireo, maherin'ny 2000 no namoy ny ainy ary mihoatra ny 6000 ireo naratra.

Taorian'ny nitrangan'ny loza dia nandray fepetra hentitra ny fitondrana Amerikana nanamafy ny fiarovana sy nanao haza lambo ireo mpampihorohoro, tsy tany Etazonia ihany no nanaovana ny andrimaso fa manerana an'izao tontolo izao, izay nisy teratany Amerikana sy sampandraharaha Amerikana, isika teto Antananarivo dia samy mbola mahatsiaro ny savahao mihatra rehefa mandalo eny anoloan'ny Masoivoho Amerikana teny Antsahavola na ny Foibe ara-kolontsaina Amerikana tetsy Ambohidahy. Ny fikambanana silamo mahery fihetsika Al-Quaida notarihan'i Ben Laden no tompon'andraikitra tamin'izany fampihorohoroana goavana izany, folaka ihany ireto mpampihorohoro ireto satria tsy nihemotra hatramin'ny farany ny fitondrana amerikana, tsy namelan'izy ireo raha tsy maty i Ben Laden ary nilefitra ny mpampihorohoro.

Izay ny tany Etazonia fa teto amintsika koa dia nisy ny fampihorohoroana, toy ny tamin'ny taona 2002, vokatry ny tsy fahazakana valimpifidianana, izay nite-

raka ny fanapahana ny lampirenena maro, ny fisakanana ny fiarandalamby tsy hiakatra an'Antananarivo, ny fanapoahana tetezana, amin'ny mahafampihorohoroana azy dia nisy hatrany ny famoizana aina.

Ny taona 2009 indray dia endriny hafa no nisehoan'ny fampihorohoroana, satria fandorana sy fandrobana no niseho ny 26 Janoary, ka tratra ny vakopirenena toy ny RNM sy TVM, may tao avokoa ireo tahirimpeo sy sary mandrakitra ny tantaran'i Madagasikara, fa ankoatr'izany dia tsy afa-bela koa ny fananan'olontsotra toy ny teny Behoririka, Ankorondrano, Tanjombato, tsy teto Antananarivo, fa nisy koa ny fandorana sy fandrobana tany amin'ny tanàna hafa toa an'Antsirabe, Sambaina, Toamasina, sns... marihina fa tsy nisy nikitika fa nolalovan'ireo mpanandroba fotsiny ny fanan'Ingahy Edgard Ramarison. Nitohy tamin'ny fitondrana vahoaka nananidapa ny 7 Febroary 2009, vahoaka natao sorona ireo, satria raha tiana hiongana ny Filoha Ravalomanana hoy izy ireo tamin'izany dia mila fandatsahan-drà handotoana azy.

Tsy teratany vahiny no nampihorohoro fa olompirenena Malagasy tsy mahazaka ny fampandrosoana nentin'ny Filoha Ravalomanana, ka mba te hahazo fitondrana, dia tsy norahirahian'ireo tsy matahotody ny aina nafoy sy fananana rava.

Nahazo fahefana ireo mpandroba, vao mainka nahazo laka ny herisetra, satria nirongatra ny asandahalo, toy ny halatr'omby, fandorana tanàna, nalaza tamin'izany ny anaran'ilay dahalo raindahiny Remenabila, izay tsy azon'ny

mpitandro filaminana mihitsy, ny mampalahelo, dia Ramatoa iray sembana nambara fa mpimasin-dRemenabila: Tokanono hono no anarany no tratra. Nanjaka tokoa ny tsimatimamita, indrisy fa ny vahoaka sahy nijoro tamin'ny fahamarinana indray no lasa matitsimanota.

Niala teo amin'ny fitondrana Rajoelina tamin'ny taona 2014, niverina teo amin'ny fitantanana ny firenena indray nanomboka ny taona 2019 ary mbola izy no eo hatramin'izao, niorahana-nahita ny hosoka sy tsy ara-dalàna tamin'ny zotram-pifidianana.

Mbola tsy fongotra ny asan-dahalo, fa tonga hatramin'ny fampihorohoroana mpitandro filaminana mihitsy aza ankehitriny, tamin'ny laharana farany teo tamin'ny gazetintsika dia notaterina teto amin'ny gazety ny mikasika ny fisamborana ireo mpimasindahalo, fa ankoatr'ireo dia mbola mahazo vahoaka ireo dahalo ambony lababatra

izay nahazo pimaso avy amin'ny mpitondra, ka ny endriky ny fampihorohoroana ataon'ireo dahalo ambony lababatra ireo dia fanakatonana orin'asa, izay lazaina fa tsy mandoa hetra, erantany anefa dia tsinjovina sy andeferana ny orin'asa mamelona ny mpiaray firenena aminy eo amin'ny fandovan-ketra.

Endrika fampihorohoroana roa no nentina ho anao ny voalohany dia izay niseho 19 taona lasa izay, tany Etazonia, ka tsy teratany Amerikana no nahavanondoza fa hafa firenena, fongotra ireo mpampihorohoro rehefa nandray ny andrain'ny fitondrana Amerikana, fa ny zava-niseho teto amintsika nanomboka ny 2009 hatramin'izao dia Malagasy no mampihorohoro ny mpiaray firenena aminy ary vao mainka mahazo vahoaka izany asa ratsy izany satria eo ampe-latanan'ireo mamohelitra eto amin'ny firenena ny fahefana rehetra.

Ny Valosoa

TONOTRALO

Inona àry no idirany ?

Maro ny olona sorena fa toa tsisy tsy idirany Na ny seha-pampianarana na ny seha-pivavahana. Lalan-kevitra efa diso, izay no mbola ifikirany, Tena tapitra tsabahan'ny mba hoentiny hidedahana.

Fandaminana fiangonana, (sady tsy azy no tsy hainy) Dia toa ahitany teny izay mitoro fitsabahanana. Moa ve misy ny tsy tiany, misy ve ny ankahalainy, Sa manelingelina azy ireo mpitondra fivavahana ?


Ireo mpitantana orinasa, hatramin'ny olon'ny fiangonana Dia mandray ny fitsabahanana ho toy ny tsy fifanajana. "Inona àry no idirany", hoy ny teny izay niombonana, Samy hafa ny "tsy miankina" sy ny "an'ny fanjakana".

Koa dia mahalasa saina raha hitohy ity fitsabahanana. Mbetika izy no "marary", mbetika no "dokotera". Mety hatraiza re no fetran'ito atao hoe "fidedahana", Fa ny lalitra no tia mitsabatsabaka tsy miera !

DADAN'i ZINA (11-09-20)

Mazotoa mikira

Fampiarahampeon'olon-droa na atolotra anao, hafakely ny famoahana ny aingam-panahy satria ny hakanton'ny zava-boahary no nanehoana izany.



NAHOANA NO MISY ?

Ludger Andrianjaka sy Jeanne Naly

Nahoana no misy ny lanitra manga ? Hilalavan'ny rahona manangasanga Nahoana no misy ny alina tony ? Hamirapiratan' ny volan' eny ambony Nahoana? nahoana ny tany no feno hoso-doko ? Ravahin-tsahondra sy felan'avoko Nahoana no misy ny rano an'ony ? Nahoana no misy ny hazo mamony ?

Raha fantatrao ny mampisy an'ireny Kalo mangina fa tsy mba miteny Bitsika moana sy hira miloko Sary mivaingana atao rindram-peo Raha fantatrao ny mampisy an'ireny ? Dia ho fantatrao Ho fantatrao ny antsan' ny foko. !!! Raha fantatrao ny mampisy an'ireny Dia ho fantatrao, Ho fantatrao ny antsan' ny foko.

**Mpihira : Ludger Andrianjaka sy Jeanne Naly
Mpamorona : Naly Rakotofiringa**

Sakafo Ny Valosoa



Akoho pané indray no laoka amin'ny Sakafo eto amin'ny gazetinao androany. Masahana aloha ny akoho, avy eo vao hatao pane sy endasina. Dia mazotoa homana tompoko.

NY VALOSOA sy Mahasoa

Fomba fanadiovana sy fanalana kentrona eo ambanin'ny maso

Fomba fanadiovana sy fanalana kentrona eo ambanin'ny maso indray no Mahasoa eto amin'ny gazetinao androany. Mixer-na na totoina ny concombre 1 efa voasasa sy voavaofy. Tatavanina ahazoana ny ranony (ranony ihany no ilaina). Totoina koa na mixer-na ny aloe vera (vahona) miaraka amin'ny hodiny, tapany kely 5cm eo ho eo, tsy maninona na tsy tatavanina aza. Akambano izy roa dia atao maska ahosotra eo amin'ny faritra tiana hadio sy tiana ho tanora eo ambany maso. Somary arahana massage malefaka (haravona) mandritra ny 5min, dia avela eo 10 k hatramin'ny 15min vao sasana. Ataovy isan'andro io fa hahita vokatra haingana be ianao. Azo tehirizina ny ambiny, atao amin'ny toerana tsy azon'ny hafanana.



NY VALOSOA sy Mahaliana

Ny tanànan'i Marojala any amin'ny distrikan'i Sambava, faritra Sava

Ny tanànan'i Marojala, any amin'ny distrikan'i Sambava, faritra Sava indray no Mahaliana eto amin'ny gazetinao androany. Renivohitry ny kaominina Marojala ity tanàna ity. Somary iva toerana izy satria 20 m ny haavony miohatra amin'ny ranomasina, izany hoe toerana tsy dia lavitra ranomasina ity tanàna ity ary lalovan'ny reniranon'i Lokoho, renirano mamakivaky ny faritra Sava iny. Toerana mpamokatra voly fanondrana lavanila ihany koa i Marojala. Mbola azo lazaina ho saro-dalana anefa no mihazo ity tanàna ity.

